

摘藻堂四庫全書薈要

集部

欽定四庫全書薈要

集部

蘇門集卷三

四



欽定四庫全書薈要卷一萬七千五

集部

蘇門集卷三

明 高叔嗣 撰

晉陽稿

自敘曰嘉靖癸巳余始出為山西叅政春去都

繇漕河泝汭歸上蘇門山以其秋杪乃履官屬

歲饑奉役往來遼沁汾潞之間無寧日踰年冬

朝京師其明年歸復自汭入晉軌轍所臨殆徧



焉亡不再至者復踰年乃轉為湖廣按察使可

謂久矣余本農夫每造山田林壑蓄志所感慨

然太息歸心萌作發為篇詠又多戎馬邊陲之

警其詩率著於驛壁吏從旁書之都為一卷畧

無去取觀之可以考歲月動定所繇自余之出

友朋亡省記余在山西者縱記之豈復知其勞

且久者乎雖余亦且忘其久何則居閒亡事優

游暇豫則視日舒長今卒卒簿書朝也疲於應

事夕則偃卧於室擾擾不知夢所之少暇不過
玩日自解如此而豈復知時久速耶夫吾且忘
我而又誰之求取觀所作篇恍不自憶雖然苟
書是以視同遊庶當有省記余者詩凡九十首
是歲丁酉仲夏望日

河西主人壁

不識河西遠留連夏日長主人設高會上客滿中堂近
海波流異夾河池館涼回瞻京邑路雲樹極蒼茫

武城漕河逢張使君考功舊寮

岸折留餘照舟行趁晚風歸心千里倦行役一時同置
酒滄波上停橈綠樹中思君如河水何日不朝東

歸途大名晚行

客心冀早安川途爭晚涉水宿阻風湍宵行問舟楫時
見遠村明月出荒城堞良時余幸遭青瑣官常攝已多
絳灌毀而無金張業來往路將疲出入心獨怯夜夢守
舊閭勞懷先已愜

初登太行山

高岳千重發馬鞍故園回望客心酸
他年筋力知衰健已厭羊腸九折難

至蘇門山二首

高尚心徒在良遊今始能
名山無俗侶日暮亟攀登
空山暑氣少臨水夏雲多
照影人將老愁心在夕波

權店晚行

孤城吹角罷黃昏歸馬蕭蕭向驛門
哀柳更添霜後色

殘流初耗雨餘痕求田未果青山願出守仍銜紫禁恩
轉入亂峰行不進投身空館寂無言

十一月朔孝義道

山城風物歲將闌行縣初因問俗安授厯漫驚違一載
趨朝尚記逐千官烟鐘動闕天微曙火樹薰庭夜不寒
久忝恩私今始悟簿書催急驛程難

太原縣西十里亭逢張景周憲使歸田

京國當年進謁曾柏臺棘寺舊儀形未言投劾歸田早

長羨出疆矯制能晉地彫殘非往日漢家兵火劇繁星
逢君便作東西別他日相思記此亭

文水縣驛壁讀王司僕德徵詩因和其韻一首

長塗無驥足短髮有漁舟感歎如同日羈牽自去秋寒
燈知客意鳴柝亂人愁屏上山川記何因認汴州

清源縣作

行縣時方暮山城歲弗登寒燈斜暗壁夜雪灑空庭案
上閒周禮囊中貯呂刑吏情那可道歸去幾時能

交城縣壁

汲黯匡君意，顏延出守情。
憑高無處語，寒日下孤城。

汾州憶家兄時自虞衡郎中左遷同知嘉興

憶昨蒙恩與子初，雙垂印綬奉宸居。
賦詩春日趨朝後，把燭良宵下直餘。
今日客身何潦草，古來人事有盈虛。
江湖萬里天南北，歲晏山鄉少報書。

十二月十四日有憶子陽仲材諸人一首

去年今日共長安，遣騎邀賓卜夜歡。
別後客身愁裏老。

向來人事夢中看，殘更改席歸猶懶。
大雪盈庭，醉不寒。
念此邊城獨坐語，相思晴月滿林端。

至日晉府拜朝同曹仲禮

王庭肅穆映朝暉，圭景纔長暖力微。
此日預沾新歲酒，同時應認舊朝衣。
暫開宮殿倍仙仗，端望雲霄拜帝闈。
不到邊城時作吏，向來恩遇未知稀。

靈石山行

長路天俱遠，高山日易昏。
強餘疲馬意，垂首戀君恩。

襄陵縣庭

邊地人愁老寒齋酒醉醒鄉心何處見院竹一叢青

夜次冷泉關用呂太史韻

山寺憑鞍歇冷泉高峯月出滿林烟非關定性人忘睡
自是驚寃夜不眠

遼州上元立春城西寺同孟東漳作

山城鐙火巧逢春野寺芳筵接故人石路晴餘雪色好
花宮滿映月輪新一杯最喜同今夕再拜俄驚見此身

舊事繁華君記否神京車馬逐遊塵

遼州即事

羈愁日日與春增分省無功笑吏能官舍到時常是客
山城多暇靜如僧新晴滿院朝來雪佳節空堂夜半燈
最是上元無意味平時宴賞隔良朋

沁州次壁韻

問年纔撫壯客路遂如今鬱鬱終何事區區尚此心奮
飛羞短羽歸去慕長林願受王喬術千秋開我襟

分水嶺晚行

客興日無奈兵荒歲屢加少年曾許國多難更移家遠
水通春騎孤城起暮笳憑高一回首何處是京華

再次權店

攝官強四月被役乃三來把炬尋山路傳餐就水隈憂
荒早頭白忍事竟心灰客姓途人記官程驛吏催梁園
即此路何戀不南回

褫亭聞邊事用壁間李川甫韻川甫大梁人

北來烽火震邊州
春興無聊客鬢秋
得喪此身真是馬
姓名與世任為牛
晴天亂雪吹空壑
落日黃雲暗道周
但有鄉心隨處是
題詩人滿驛前樓

送馮廷評還闕用韻

銀鞍白馬使臣尊
賓從如雲晉北門
滿目邊城春草綠
因君長憶帝京原

潞安道公衙罷

微雨潤春郭
層雲冒空山
訟庭方散吏
高閣閉重關
緩

帶不遑息投身簿書間念昔郎署居此時曹務閒焚香
娛道心服藥養羸顏良遊忽如昨行役無時還邊州多
客愁日夕髩將斑

由關子嶺發兵入綿上

儒衣曾事主羽檄且徵軍敢奮一朝畫而邀百戰勲深
山連古木落日斷黃雲愁思荒村夕誅求不忍聞

清源縣再作時上疏乞解官

抱責朝還夕經途去復回山城仍滯雨夏館始聞雷客

病關愁得鄉心逐夢回投書報明主早晚歸蒿萊

奉次艾峯侍御送李叅政平寇後擢任南陽之韻
中臺決策靜妖氛幙府才賢獨冠羣正有捷書傳白日
況兼寵命下青雲鳴笳喜動三關士授鉞功先四道軍
見說南行蒙上賞汾陽人勒去思文

汾陽道暮晴奉和姜侍御

連城催暮角暑雨變新晴垂穗綠槐合將雛烏鳥鳴山
川發高詠州邑寵巡行莫怪炎蒸歇霜華滿路清

孝義道曉發

新雨曉天霽餘霞抱日長平原多草樹夾路鬱青蒼下
馬文侯墓看碑卜子堂埋輪一何壯共識無豺狼
施同寺是日奉陪姜侍御不及

樓閣丹青上烟虹石壁重雨餘淨香界天際響疎鐘汾
水當階次綿山即近壩題詩人不見驄色亂雲峯

冷泉寺

露晞長林下酌泉大士家根深別有水色冷不關茶香

象浮深壑毒龍護淺沙煩蒸若為減客思正如麻

奉酬姜侍御見贈之韻

探奇曾禹穴能賦豈天台長自羞知己徒言謝上材憂
加年近老名在毀重來欲去猶增戀歸心寄草萊

盤陀驛再用沁州壁韻一歲中四出此路

乞歸又晚計奔命尚如今九折無良術三鑽豈夙心客
程任春草官舍即晴林便作途窮哭闌干淚濕襟

四月望後二日奉壽永和松山殿下八韻

圓月光仍滿輕風夏始溫降神元此旦秉德自先藩玉
殿朱紘合瑤宮紫氣屯雙童時獻藥三老遂通言汾水
連天濶綿山挿地尊儒衣得上客服冕盡諸孫齊奉千
秋曲爭持一日樽淺材何以頌抽筆愧梁園

秋日早起偶題

鏡中一夜恨攬此二毛增寡識時方忤多憂日不勝雲
霓發宵夢簿領迫晨興脫屣吾將往丹丘尚可仍

提調山西試院贈諸廣文二首

重門照月景華館肅秋陰吹角烟樓暝懸鐙夜堂深聖
代急求賢不吝千黃金辟命來四方文儒集於今芳筵
列珍馐盈尊敬子斟大國富俊豪譬木產鄧林所願獲
異材以慰如渴心朱絃曲未奏清廟樂將沉希君鑒幽
潛為我揚洪音

惟昔忘疲謬趨役嘗南宮藝林閱衆彥文事叅羣公琳
琅充天府但媿非國工親交一旦遠悽惻數年中遇子
携手歎感我夙心同廣庭曙色啟層閣銀河空出門賓

御散嘹唳聞高鴻離觴在朝夕別路長西東何言秋欲盡追憶無時窮

九日河汾書院雨雪陪諸公宴集

千山風雨集九日雪花深歲序嗟如此賓寮盛至今酒中催夕暝樂進解秋陰醉傍龍山飲誰憐幕府心

贈亢思謙入會試因寄京師同遊

函谷投繻日靈光著賦年

王文考十九歲

古人猶汨沒今汝遂

騰騫神寶初開璞龍媒早受鞭通衢千里駛美價十城

連藝苑材如此離堂意杳然行收金馬績高視碧雞篇
京邑多朋舊同聲若為傳

齊中檢舊集因呈孔文谷學憲

寒城朔吹動庭樹曉霜繁省齋稍無事馳情念舊園發
篋理塵帙展玩不知煩往事盈篇章幽居多苦言郡中
盛儒彥暇日遂討論敢為矜文譽要識夙所敦廣堂宴
晴暉旨酒湛芳尊言笑一相投逍遙窮朝昏心賞不易
值素交世罕存疎簡本吾性牽拘守茲藩高車數來往

無為厭公門

宴別文谷先生赴祁州

擾擾時相見悠悠遽遠辭
離居不可道行役且焉之
歲晏冰霜厲天寒鼓角悲
軍城數杯酒官舍滿篇詩
感激多新調飄零最苦思
才高世總棄名在衆方推
暫識風塵色行霑雨露私
郡齋暇北眺猶接帝京陞

余吾驛壁

秋日何淒冽曉雲陰復晴
客行多所懷鬱鬱獨含情
登

高倦長坂涉水亂河聲僕夫不遑息投館晨雞鳴惟昔
負微尚于今遂無成田廬日榛蕪何由反躬耕寄言同
志者羞作望塵迎

送楊方城中允拜表赴都

新秋雨微霽山川氣蚤寒朝日照長林陰霞冒層巒咫尺
神京路追餞不可攀大君方垂裳海宇息波瀾八方
修臣職表賀集長安天門闢日月神宮栖鵷鷺甘露降
中庭色潤黃金盤跪進萬年壽夷夏靡不驩仙管奏樂

府寶饌出大官君臣高宴會維時良已難盛世思夔龍
留佐虞廷端而我寄邊隅遲回亦何歎

發平定

以下入觀作

空山懸日影長路起風寒京邑方趨役邊城遂發鞍孤
心向誰是直道匪今難不是秦關客貂裘亦已殘

井陘道中

曉霜塗屋重寒日出林微改轍辭邊徼登車望帝畿深
山藏驛道巨壑斷村扉欲問前征侶迷津何處歸

得京邑書次新城作

邊城迢遞強西還歲暮征車入帝關風定塵沙迷舊路
天開雲霧認前山寄心轉切鵷鴻侶投足新從戎馬間
謾道姓名人憶少瓊書長把慰愁顏

良鄉壁間舊題間有虞衡家兄和句

江海飄蓬歎此身重來拂看壁間塵五年題字今不滅
兄弟相思淚滿巾

過真定呈周中丞

萬國朝正屬歲繁上遊要害此邦存使臣北下頒銅虎
質子西來敞玉門自是霜威清道路無須雲騎護郊原
宋都鎖鑰真堪寄漢代扶風未足言

春日同上黨栗道甫登毘盧閣

祇言遠出守何意暫歸朝僧舍春陰重神京暮色遙向
來成夢幻所歷盡塵勞須共登高閣客憂賴此消

出都

驅馬臨長坂征徒動遠情官橋楊柳映客舍春鳩鳴榮

進顏前志激昂謝後生親交好相語此去卧柴荆

寒食定興雪中

二月鶯花少千家雨雪霏可憐值寒食猶未換春衣積水生空霧高城背落暉忍看楊柳色從此去王畿

定州道

夾岸新楊映廣津客行無緒獨愁人故園亦有千頭樹
二月中旬返水濱

再次真定城別陳秉中時自京西還

經途雨雪涉冬春倉卒重過奈此身客舍留人酒甕熟
官橋繫馬柳枝新河山半折北來路烽火全驚西望塵
別去定知頭白盡邊隅誰念一征輪

星軺驛雨中別林八南還

驛外陰雲合窓中宿雨含深巖龍自鬪險路馬能諳短
髮星星甚長愁日日堪休將南望淚歸傍二親談

再赴晉陽太行山上作

祇役方如昨銜恩更此年可憐客鬢改應厭馬蹄穿萬

壑深蟠地孤城上捫天東南回眺處愁絕故園邊

避雨五嶺山

鳴雨斷還續連山下復高踈慵元自慣登頓爲誰勞問
館投身促防崖著足牢客程憐若此終念反林臯

再過紫巖寺

受事方從北持車還向西青林含日影赤坂造天倪宦
味同雞肋官程任馬蹄蒼崖摩遍認隔歲幾行題

雨後拍井同方體易

疎館餘晴片日暉陰移高樹晚涼微自窺水檻人將老
轉念山扉客未歸天畔綠虹臨戶映風迴白雨過村稀
荒庭一醉拚君共呼取濁醪興莫違

自柏井還平定山行用西陂座主韻

渴汲香泉玉井瓶午行愁熱待昏星空山寂歷鳴蟬斷
潦水縱橫足馬經日下孤城邊氣紫地偏六月草根青
休將淺薄供時議自合深栖與世冥

飲平定孫太守宅奉贈時壽八十二

榆關月出滿晴暉留客芳尊盡夜歸
本戀青山辭虎竹
甘垂白髮守漁磯藥欄傍戶花香入
藤樹當庭葉露微
便向磻溪問良健周王仍欲夢熊非

壽陽東寺閣憶體易

朝來攜手罷夕間賞心同
岸幘層樓上馮軒野寺中
嵐光冒邑里秋氣變林叢
坐使客愁集非關尊蟻空

太安阻雨有懷都下諸友

蒼蒼雲木變川原黯黯客愁獨掩門
卧聽遠春白日靜

起看陰壁綠苔繁官名薄劣慚新侶郎署遲迴念舊恩
強欲題詩報同舍便應投劾去鄉園

還自鳴謙山行用前韻時體易使君亦至

塵鞅苦西東追攀日復同戍樓雨宿夜山館曉行中峭
壁排雲樹崩湍下石叢流觀亦可悅寵辱此心空

平定城東西交口用壁間韻

敢言觸熱倦悅此午陰長蘭氣清林薄蒲風散野塘高
陵堪下馬怪石欲成羊可念征途侶題詩偏驛堂

宿八角

嚴更金拆起杪歲玉關寒行侶時相問邊程進更難歸
心惟日夜客鬢已星殘仰悟中林羽投枝亦未安

晚趨忻口

雲峯聊極目立馬獨愁心豈直關山遠其如雨雪深笳
聲先入夜邊氣迴生陰疇昔長征意蹉跎力不禁

忻口趨五臺一首

戍鼓行人斷客心日暮悲長風卷沙塞積雪滿山陲濡

迹亦何久孤蹤遠更危含情不勝道縱道知從誰

途經五臺山不及攀游

客路迂回甚驅車悵此分懸崖晴度日洞壑晚生雲
怵迫非吾意悲懽與衆羣終當卧靈岳夙志豈徒云

偏頭關傳節度宅守歲

深堂絃管雜邊聲幕府宵嚴刁斗鳴起舞更衣聊自慰
懽歌縱酒不勝情關河絕塞催寒盡烽火連山照夜驚
改歲不辭征戍遠其如客病卧邊城

再出太原赴石州

舊路三年倦新林二月餘行旌晉祠水田鼓漢城墟願
以烹鮮治無因害馬除往來竟何事媿爾行春車

仲春山行

春事殆過半客行殊未閒流雲開白日微雨點青山身
世本遲鈍林臯當早還烟郊草色長感此奈愁顏

經向陽硤

屢飯青岑下力疲路轉長投身應虎穴頓足即羊腸天

地固無外關河祇自防驅車舍此去余意戒垂堂

還自石州作

傍舍新泉注歸途柳葉開出無十日計行作千里迴衣帶不遑解車輪亦已摧公私兩何補驅走笑非才

三月二日交城大雪

建辰開此月上巳預今朝柳絮寒應未雪花晚故飄輕盈對山榭點綴愛芳條若伴邊愁客經春總不消

鳴謙驛夏夜

閒館草生徧芳林夏氣清月華何泛灩天宇益空明懶
慢本吾性羈栖非我城投冠還舊里庶此達人情

寄家兄祠部郎中時自嘉興同知量遷

自別五更歲相看千里長聞辭郡府謫欣拜禮闈郎稍
進雲霄上還追鴈鷺行趨朝日振珮直省夜焚香得罪
皇仁闊失羣予志傷氣猶負然諾力已困迎將春草邊
城綠寒雲戰地黃憂心何以見視此髣毛蒼

辛廷評慮囚後喜雨

周人憂旱虐漢使寵循行不睹甘霖注安知讞獄平乘
颶驅暑鬱入夜潤枯榮河漢分天澤雲雷慰物情一言
折疑事九死出冤生流惠長無極汾川比頌聲

省中夏日述懷

聊遣塵事營宴坐適心懽重門永日影開簾新雨殘山
城方覺暑水木湛生寒夕氣冒川澤晴霞映林巒顧懷
職司憂眷然發長歎華居豈不崇斯人詎獲安先民計
日食所戒在空飡薄俗匪足矜要使寸衷殫

賦得蟠桃核奉壽朱使君太夫人

昔西母降於集靈東方竊於金馬蟠桃之事世以為
妄然陳核傳之先代斯物藏於大內宋承旨景濂賦
焉故詠云爾

瀛丘初種處漢殿稍當時遺實神應守殊形衆詎知加
穀登玉案注酒比金卮一獻高堂壽千秋樂不支

赴平陽之役次冷泉關

羣盜無由歇官程詎敢寧征衣犯晨露吹角動寒星匡

時悲深志逢世謝壯齡誰言關路永馬足歲常經

霍州旅次

久客顏將老逢人舌尚存欲詢干主策所願與誰言
霍嶽三年路汾橋十室村不堪驅馬去秋日易黃昏

送方體易秋日入都用韻

大壑朝霖滿邊城秋氣高亦知王事急終念客行勞
騏驎悲長坂鷄鶩駭太牢憑君報京邑曰余返東臯

南關晚行

笳聲入晚不堪聞
驛路山腰向此分
洞壑空濛秋雨雪
巖崖突兀石生雲
愁心胡馬方頻入
寓目冥鴻定幾羣
歸興轉從今日盡
將因沙塞著微勲

歸次南關驛作

祇役忽於今經塗宛如昨
秣馬息荒林振車越重壑
歲暮滯還期客心悵不樂
曰予本沉冥遭時乃獲落
化海異微禽蟠泥豈尺蠖
方因遷斥餘始遂歸來
諾逝將入雲峯滅迹從所託

奉別南山藩國殿下用韻二首

玉卮申款宴金殿
覲丰神高視文
猶古虛懷德益新
飄零敢自意迂賤
許相親每憶文園
夕留歡倒葛巾
再奉瑤篇至長塗
慰別情文章魏陳
思寵譽漢東平
日暮余吾道天長
潞子城拜瞻竟無
路祇有客愁生

沁州張源舖

去國三年意還家
此日心天寒客路
永日暮衆山深沙
塞人偏老風霜馬
不禁如何更萬里
投迹楚江陰

蘇門集卷三

欽定四庫全書薈要卷一萬七千六

其部

蘇門集卷四

明 高叔嗣 撰

入楚稿

高君自山西左參政轉遷湖廣按察使去住所
得凡十三首為入楚稿

量移湖南用文谷韻

歲暮邊隅客歸來見此身馬蹄穿欲盡虎穴到為鄰漳

水經塗舊湘潭去路新我生豈斷梗逐處任飄淪

陽曲灣作二首

閒庭芳草日分長疎雨高槐夏轉涼一片鄉心千里目
青山無數晚蒼蒼

湖天杳杳夏吹風涼雨濛濛夜已空夢入梁園樵采路
覺來身在戍樓中

二月十日至尉氏

含悽去舊里秣馬頓荒城是節春將半崇朝雨再晴
鶻

鷓鴣欲作語楊柳盡垂榮楚塞杳何所嗟余方此征
許州城南道行酬左君舜齊招隱之句

微陽稍晴曙新雨被山川芳樹交生道春流灌注田耦
耕本夙志驅役乃茲牽未覺江湖遠投身竊自憐

襄縣城東即事

春晴汝岸曲夜雨襄祠東日出冥濛霧天垂斷續虹關
梁臨水閉馳道與山通旦夕龍輿度千城望幸中

龍泉鎮作

落照寫澄潭石梁水半含可憐雨氣歇復與天光涵客
路乘春景人家映夕嵐我行殊未倦彷彿見荆南

呂潭境上

連山望不極況復楚雲長萬樹含春色孤村帶夕陽解
鞍當古戍投袂及空堂去國日方遠懷君意敢忘

漢江春日舟中

漢臯微雨點人衣江路南衝鴈北歸寓目不堪愁遠涉
投身方自愧高飛纜牽蘅杜多春氣船泊雲霞變夕暉

未許笠蓑同楚父來逃榮祿守漁磯

初泛漢江東峪使君邀飲習池

大堤兩岸春流滿峴山十里銜日晚
新雨深沈洲嶼移餘霞明滅川途遠
南來鞍馬背高城泛舟始作漢江行
總轡昨朝當寒食鼓枻今日值清明
清明寒食愁江路逢人乍問栖泊處
楊柳深垂渡口喧桃花淺映村頭暮
襄陽使君乘暇日邀飲習池酒興逸
然燈清夜歌管鳴吹角蒼波魚龍出
去國未覺客身輕乘流翻恨風帆疾

別君轉入江湖長明發解纜情如失

自承天進船暮至潛江寄郭舜符

漢渚雨聲深日暮愁客心楚山雲霧多其奈客行何時
時登岸覽風物往往張帆去超忽泱泱江流雨正添蒙
茸春樹日催發茲行豈是乘桴意欲遣虛舟隨所至生
年本自江海人終朝遂諳魚鳥事投札鄉園報所思
芳欣及仲春時頓忘異國勞行役但闕同心廢賞期

省閣率爾題寄同懷

下車春草歇掩閣夏雲深情以軒裳倦愁緣節候侵訟
庭白鶴毳解宇碧山岑乘夕恣游屨憑高敞鬱襟連天
通漢水多雨暗楓林畏鵬非前志為鵬想壯心越鄉誰
不感題此繼莊吟

廣視堂作

茲堂抗峯首伏檻即江流夕日川新漲空天雨半收烟
虹形婉約石壁色青幽行藥恣閒步題篇紀勝遊城鄰
龍伯國宅並羽人丘臨眺非無樂客心自有愁

夏日作

宴坐清煩暑闔扉映夕曛山堂聊假日水氣自蒸雲處
潔嫌新沐懷奇厭舊聞齋中無一物几上太玄文

軼稿

高君先自吏部乞病還蘇門山者三年復從蘇
門山還朝逾年然後外補中間題咏頗衆今考
功讀書二稿乃其自選多所不載何也括其遺
編不忍棄選其優者凡五十二首為軼稿

銅雀妓

松柏墓已拱綺羅臺未空青冥上駐日白雪下流風雅
曲此遺嫵勞歌誰與同君王自不見闕寂無終窮

題馮正伯卷

太息高蹤客誅茅滄海邊同來負鼎日共憶挂瓢年梁
父龍初卧南山豹正眠有纓濯孔性無楫濟商川才為
蒼生屈名緣赤紱牽九臯空唳羽七水但流絃僕類蓬
南轉情同橘北遷塗中曳尾地轍外涸鱗天仰視鵠應

嚇却驚鼠可憐重尋顯志賦長捐願歸田

檢校戎器

弱冠伏南土微才卓不羣雖懵坐勝術干戈非所聞九
域效泰運六位升明君黃石埋兵畧青藜照秘文搃矢
積北闕絃琴奏南薰龍庭元刊壘虎賁久息軍如何儲
戎器還以事邊勲鶴膝非時急犀渠要日焚折衝存墨
帶多算騁皇墳願言思農扈王化在耕耘

病居

得坎願自息披離忌有眚卧病還以嬉煩囂暫一屏孤
賤本寡儔昇平邁多幸束髮辭丘園登軀入華省王事
累朝夕非才充俄頃不堪類昔稭自免乃今邴北顧尚
濡迹南歸徒引領歲暮詣空山耒耜方當秉

主客行

主人為壽客起酬今宵有酒可無憂鐙前大笑呼五白
場中試賭弊貂裘去年奏賦驚天子今年謝病歸田里
當路徒嗟少故人寧期行道得知已慷慨翻為他人論

結交慎莫向金門

門有車馬客行

京城十二衢輪蹄何縱橫縱橫行且止金張門已盈媒
拙坐趙趙言巧通逢迎中厨命豐饌四座羽觴傾南冠
進楚舞西瑟發趙聲辰會日移中昏宴及鐘鳴主恩諒
不訾殺身良為輕片辭重大呂一願越兼城何如草玄
客寂寞擅英名

應僕

晨趨長安衢冠蓋何逶迤歸視相國第輪蹄交中遠寒
熱各有宜巧捷來相追拊膺悲遇晚握手稱新知一顧
辭白屋片善登赤墀車馬如流水高門象海涯主獨用
憔悴談天祇自奇閉門幾廿載無由免寒饑公孫起徒
步黔突為帝師董生獨寂寂區區苦下帷濫竽竟有合
敝帚將無施深謝彼豎子夙志良自持守免誠言謬屠
龍豈憤遲卑高雖異勢慶弔亦同時浮榮等過隙暫跌
若頽坻布被不覆寵禍載牛車危三年避園圃英聲千

古垂守玄慕二老養素吾不移
逝將還舊臯耕牧潛東
菑咄嗟奴僕心多言益見嗤

中秋無月

三五唯今夕烟霜斷昔歡埋輪
潛泣兔掩鏡暗翔鸞風
笛金天徹星樓子夜寒客衣素
已變不分向明看

秋思

涼風今日至鴻鴈欲南征
衣緩他鄉帶心翩故國旌
園
荆愁外死池草夢邊生
會挽高飛羽凌天寄別情

雜詩

窮巷寡人跡當戶生芳草伊人空堂上徙倚傷懷抱獨
攝敝衣冠容色何枯槁飛鳥更我庭歛翼空山早仰視
默含情思歸故鄉道

感秋二首

候羽三秋至層鱗四運移商風吹地籟兌日正天時魚
輟涸誰訴駒轅伏自悲紛傷庭木脫夢繞故園思

玄蟬辭夏露丹木受秋霜坎壈應懷楚離憂欲奏商勞

生嗟害馬失學歎亡羊蘭芷空山路披襟耿未忘

贈別茂欽

昭代富文化九葉何光華君初奮海裔應運生王家余
本孤賤者射獵夷門野偶起攀飛龍俱載入金馬結綬
自茲朝鳴玉日逍遙亨衢孰予假同升上宰朝分曹青
瑣闥聯步黃金闕居常願接屋游每得并縻晤對無朝
曛發蒙多所聞玉壺湛芳醕寶帙散仙文相知恨不早
相與傾懷抱繾綣三年間莫喻同心好奈何忽分張念

此使人傷銜哀赴隴墓反塋歸爾鄉倉卒發皇邑追餞
難再及一臨萬里途三歎各於悵昔為連茹草今類孤
根蓬我身非吾有誰使西或東離別易永久聚散誠不
偶願言指素心努力望白首

送許廷議

孤嶺鬱蒼蒼龍沙出塞長千金收駿骨萬里歷羊腸雲
就親庭色星分使路光亮為汲長孺隨力護封疆

駕出

帝出南郊日言觀黃屋尊選神役風伯徙樂具雲門馳
道青陽麗齋宮紫氣屯九朝祠禮祕歸待從臣論

駕入

萬乘因春駕千門洞曉扉鸞旗紛既至龍馭宛來飛日
月隨靈璽星辰撫帝璣還同受金策六觀紫宮歸

讀史二首

蕭生抗奇節立語忤當時解劍義不辱抱關身敢辭伯
喈涉叔世髡放久流離董氏握天憲臨命何狐疑知死

亮難塞猖蹶反受嗤雄傑在末位逆曳恒足悲結髮事
天子兩絕良無期全生忌衆怒庶與哲人知

傳子夜蛾感張公海燕篇撫膺慟末路發憤睹遺編憂
來每側足患至豈息肩巢由既在野沮溺亦在田達人
貴先識懷寶乃稱賢

送張子魚太嶽叅議用家兄韻二首

客路情何極臨途別所親威遲駕欲發隱閔思難伸柱
始題仙侶環終賜帝臣交期無嘆遠白首肯如新

妙有丹丘建虛無楚岳寒五圖配神異七澤擅遊觀雲
卧靈為友天行帝與歡知應逢石髓留減待余餐

海口

海路連天極河流遶國門氣迎朝雨至川束衆流奔
隱霧行隨豹搏風坐辨鯤乘桴意何限揚楫倍傷冤

晚行

去國芳春在行舟首夏臨沙痕前水耗雨氣晚山陰
衾枕容顏改衣裳節候侵不堪采菱調斷絕滯歸心

讀書園始遊覽

伯成善養志沮溺無仕心惜予不及古逃祿歸空林林
空杳靜默抗宇疏高岑排戶羣木秀浮階大壑深發書
玩農術作歌學樵音輟耕空隴上徐步荒城陰身悲離
羣獸目感歸栖禽雖微貞士操絕軌猶足尋役形多衆
患遺物無或侵儻偕彭氏老異世開吾襟

酬空同載酒見尋二首

負郭幽常卧移尊遠共尋觴中泛野色座右落城陰自

顧籬蒿滿還驚巷轍深相看欲何語疲病謝朝簪

農畝遭炎暑賓遊踐遠郊輟耕元水曲暢飲即城坳長
日蟬聲靜微風樹色交空承白雲詠顧許愧林巢

東郊雨中東士量

閒居甘絕跡疎雨對芳原念欲開青眼誰還共綠尊林
烟旁舍午野色遠村昏自笑平生意無人空閉門

秋郊雨後

空闊容秋望虛徐步晚曛夷門新夜雨太室半晴雲犢

放前王地身閒野客羣
鳥來幽興愜誰語遣相聞

喜蕭司勳袁比部見宿山園

上客何時見中國屏卧幽門連
葦野樹路轉信陵丘共坐深林
晚紛看落木秋非君憐病侶誰
向此淹留

刈禾了晚望

禾黍空場圃秋風滿近田出門
看曠野倚杖向高天嵩嶽孤烟
直蓬池落日圓醉歌有鄰叟共
笑夕林前

谷杏山宅田水南限韻賦喜雪

嘗聞洛闕呈祥日復此梁園對酒情故里衣冠時共集
豐年隴畝兆還成金尊側引瑤華入青閣高臨玉樹生
今日正須修耒耜東郊驅犢伺春晴

題東門壁

試走夷門道徘徊念此身抱關空有客虛左竟何人

寄霍山人歌

驅車意不樂還出梁宋門馬頭逐殘景野火連孤村北
風颯颯吹郊樹明月照見村前路東方隱者昨歸去相

尋不見空相慕隔縣即同莘野田逢人只在空桑住明
時不合但漁樵少年豈是窮章句羨君苦節應多奇嗟
我支離亦如斯夙昔產業身無賴長大衣冠名未知有
如徒步謁天子無可解印歸田里方計為儒世已驚祇
言作吏人同毀畫堂賓舊走營營柴門容髯看秋水西
望夷門厭紛華東來却出寒城裏顧此栖栖何所求釣
魚牧豕適吾謀野田憶汝不堪寐把筆題詩此夜愁

呈枉顧諸君子

誰復臨窮巷丘園問腐儒寒醪傾鑿落野飯進雕胡開
牖連雲白穿林照日孤歲闌總相笑何處覓潛夫

簡思仲

涼野轉蕭條秋林自晴朗靜看霜葉落悶聽寒蟬響朱
紱與時違素髮隨年長安得攜手同常此丘園賞

九月六日元玉侍御汝愚都使上方寺閣

官曹雖異迹梵宇忝同遊預有重陽酒兼當故國樓登
臨殊憶昨疲病颯驚秋不借空門樂那寬北望愁

九月十日晚登城樓同川甫

暝色起郊關層城烟霧間
千家響砧杵四顧滿雲山
片月增愁思涼風減病顏
登高情未已還共此追攀

元玉送至河上夜飲作

野館接芳筵客心尊酒前
終知臨路別且戀對床眠
近壁燭殘夜開簾星滿天
鄉園猶在眼卧此已三年

淇上

旅館值芳辰留連淇水濱
猶憐官道柳滿目故鄉春

毘盧閣雪後招儀曹諸同遊

春寺朝來雪微融望已晴千家柳色淺二月桃花生白
日照仙閣青山繞帝城馮高遲數子此際願同行

與仰之閣上限韻

晚日層軒上涼風散客衿登臨思不淺留滯夏將深三
十竟何事一官空此心無驚寵與辱老氏有明箴

贈子晉

濁酒相逢即為開憐君況是洛陽才久淹帝里誰能念

數過禪扉獨見陪
四月溫風吹草樹
西山落日映樓臺
它鄉盡醉無不可
愁見都門歸馬催

人日省中同正夫

官閣晴雲滿
春庭夜雪沾
綠尊應汝伴
白髮為誰添
多病能相惜
微官敢自嫌
流光無奈此
日日客心淹

重五日宴集張宅

將軍賜第敞園林
上客邀懽得暫臨
絃管坐消白日暑
衣冠起挂綠槐陰
官曹多暇乘佳節
客路長愁損壯心

須把菖陽頻送酒明年聚散倘思今

送許中丞挾水出撫畿內

陸海邦千里黃圖帝九圍選賢每推食佐聖本垂衣詎

意日多儼方嗟天降威流離詩在是反覆事何非

用翟子威

暫輟霜臺亞羣馳星路暉寵光假金節拜命出黃扉疆
場當專制朝廷正塞違決河傷漢緒分陝壯周畿願見
功成日時來朝禁闈

奉和太保桂洲公二首

宮酒先頒帝右臣，恩波曉逐歲華新。
飲同湛露詩歌雅，道合皇天嶽降申。
中使頗傳初釀法，大官不數舊藏珍。
嘉名願叶春王壽，涓滴香分萬國仁。

右元旦賜
長春酒

燎火陳庭逼曉明，青旂鸞輅簇春城。
朝吹仙管條風應，夜灑瑤宮瑞雪平。
天意三陽開歲始，帝功一紀被歌聲。
共知調變人難頌，稽首明堂布法清。

右正月三日
立春早朝

赴晉渡黃河

王程不可緩，去此故園難。
晚日臨晴渚，秋風動早寒。
山

田十畝廢蓬髯幾絲殘顧影真成笑馳驅為一官

將歸蘇門山題王度支誠甫潼川卷

十年出入紫宸班多病空知戀北山塵髯獨憐為客倦
道心長共野僧閒行窺白石尋初徑坐對青松守舊關
惆悵王孫不歸去潼川桂樹許誰攀

進兵介休

卷旆輕風發趨程落日懸重來介子縣還渡魏侯川吏
道堪頭白兵戈正眼前親交齒盡落歸計只年年

送馬二來視其弟遂歸上蔡

握手慘離羣，白眉重昔聞。
星辰來暫聚，鴻鴈去還分。
春入荆南草，天橫薊北雲。
新豐空復客，無路薦明君。

別顧武祥

夙昔屬良友，同聲豈異時。
謬緣驥尾託，常識鳳毛奇。
長價方推爾，懷芳每在茲。
分飛意無限，眷戀寄南枝。

送劉侍御叔正周侍御時伯視學南北

二京方選士，三府共推文。
辟下中臺動，章連內殿聞。
春

催道鐸振星與使軺分桃李江南地驂騑冀北羣還觀
文體變得俊答明君

除夕

殘歲何俱盡微情浩不窮引卮留夜色燒燭候春風旅
跡孤蓬倦離心衆草同勞歌無處語楚水正飛鴻

是時家兄

使承天

歲十一月皇陵山上作

北上陪嚴祀初行詫所經龍蟠包地脉象衛列天星積

雪千山白屯雲萬樹青神霄騰寶氣夜壑下仙靈險固
合三用乾坤得一寧傳圖會有永探策授奇齡

鄭師周石村卷題三首

高尚意何如窮山聞卜居神功無禹鑿人物有秦餘疊
嶂維靈境孤峰冠太虛時因費杖履觸處覓仙書

結構傍嶙峋幽深自可親雲峯連海嶠泉澗達江津獨
立迷山鬼端居養谷神何須羨谷口君即子真身

世故攪余愁平居寡所仇有生皆白髮無地是丹丘稍

抑六龍駕還追五嶽游思君栖息地去此暫淹留

禁中遇雪時有詔祈之

落日長原獨客行郊園暑歇正新晴林懸宿雨千村似
禾入涼颿四野平尊酒笑從田父飲柴門靜識古人情
翻愁人擬陶元亮前徑初無五柳名

自西園移向城東稍幽寂

微生無定蹤擾擾誰為慮始營西郭居復戀東郊住東
郊長幽寂野逕迷行處茅宇遶疎籬空階垂茂樹是時

仲夏中林雨開殘曙無人啟深扉永日多新趣卧聽遠
春聲起看前村路兀傲不知非翻恨來茲暮如何玄豹
姿更隱他山霧

送別袁永之

冠蓋中朝舊田園野客扉異時梁苑地今日長卿歸疲
疾馮秋健懽娛悵遠違須知獨耕處一望使星暉

九日有懷家工部兄

無客荆扉掩蕭然病卧時荒村夜聽雨佳節曉吟詩鴻

鴈銜書少黃花對酒遲楚山萬餘里今日最相思

西園宴集譚侍御空同本貞二憲使

閒園一杯酒還與故人同借問茅簷下何如柏府中城
烏窺客晚野樹落筵空却愛霜林靜留懽共不窮

秋夕憶兄

一樹秋風落漸多高天窺鳥暮雙過欲將遠字愁難送
正把新詩悶自歌雲外楚山移使節雨中梁苑對耕蓁
柴門此日誰憐病情極湘江萬里波

飲酒空同海棠樹下分得一字

庭前有奇樹含采弄春日托根盤石間垂景幽蘭室攀
條事可憐對酒情非一空嗤嘉樹傳賦爾慚抽筆

夏日田水南別業二首

愛此君何僻憐余遠更親上皇猶古俗中散即今人樹
繞夷門口隄橫汲水濱他方炎熱及逃暑欲來頻
荷篠時相問銜杯晚暫同南風當坐滿大暑入林空勛
業浮雲外田園醉眼中前村亦咫尺歸路夕陽紅

陽春曲

遲日麗原野和風扇芳林梨花覆白雪楊柳苑黃金峴
北懷何極荆南思不禁睹時謝寂寞佇立吐高吟

秋日

閣道涼風日已嚴空庭落木曉相添病身虛擬秋來健
客路真驚歲尚淹北海鵬風猶未徙南山豹霧合終潛
悠悠感事徒增歎歲暮誰從季主占

雜詩

悲風乘夕興木落歲方晏肅肅鴻鴈征悄悄客心羨王
途悵多違三歲餘力倦興懷念故閭撫事夙衷見平生
素絲姿豈為玄黃變知我亦已稀誰論貴耶賤

賈令驛

策馬寒雲髣脚垂歲闌深歎客行遲亦知拙病今仍出
歸去青山定幾時

靈石縣作

殘冬猶按縣落日稽官程閭里何蕭條荆榛正縱橫道

逢流亡卒但聞悲泣聲不能舍之去且為緩前旌匡時
豈乏策牽迫非我情高職久為忝曳組暫百城

星軺驛

萬山詰曲此孤亭遠客西行暫所經生事不堪頭早白
世情無賴眼常青深林落日憑軒望亂葉吟風隔坐聽
寄謝尉羅當日者高飛今已入冥冥

南關驛壁間韻

際曉霜風急空山落葉寒微名沈吏跡久客笑塵冠改

轍登岡險尋源出路難回思高卧者茅屋有餘安

還次陽武與孔文谷飲和其韻二首時冬至後

客子多苦辛塵滿征衣裳旦下太行坂車輪摧羊腸邊
戍久不歸馬毛變胡霜安知平生親合并此中堂廣筵
羅絲竹寒日懸晴光陳觴未及飲感往各自傷歲晏客
如何欣願履初陽

我心鬱不樂豈乏禦冬裳馳情多所懷無以布私腸山
川行不竟飄飄冒風霜感彼瑚璉珍胡不置明堂時俗

難與謀神寶秘其光每用攬古昔怒焉心自傷驅車復
辭去陟馬大河陽

七夕賦得牛女

銀漢涼風起靈妃此夕過流雲通聚語微月照凌波帝
樂無新曲仙機有舊梭應憐並飛羽忍用鵲填河

夜懷家兄時有七歌示叔嗣

高梧殘雨滴涼氣晚來生一夕茅簷下思君千里情夜
蟬臨戶響晴月度林明要自離居苦長歌不遣平

讀薛考功所註老子

雨餘長夏交動望皆成趣
雛鳥發新聲殘花開芳樹
濁醪聊自斟輕葛始當御
手持老子編目覩薛君註
因之懷人心況以薄世故
曲几在深林起視不覺莫

書壁

方知日月易歸來已三年
先世有敝廬遺此東郭田
況遭聖明君問井各息肩
自我解朝籍抱病常晏眠
衣冠挂塵壁起來茅簷前
有時負藜杖逍遙看晴天
柴門白

日景雞犬鳴籬邊中心私自念微願倘能全安知被嚴
命尚為尺組牽不行冒時禁欲去且留連仰扳道傍樹
手種皆可憐人生豈落葉一往隨風遷亮懷達人心萬
乘猶將捐終當復來反不愧昔時賢

蘇門集卷四



總校官庶吉士 臣侍朝

校對官編修 臣閔惇大

謄錄監生 臣楊仁基

欽定四庫全書薈要

集部

蘇門集卷五

六

詳校官候補通政司經歷臣郭祚臧



欽定四庫全書薈要卷一萬七千七

集部

蘇門集卷五

明 高叔嗣 撰

序

送仲純李君赴四川建昌道少叅序

十一年四川撫臣言四川郡縣宋某遠在西垂而建昌
接連西域孤縣一方去省城千有餘里屬麗永鹽井之
際仇殺守巡官不可一日闕且雖有之或一人攝三四

道者地遠事繁難於徧履惟上眷念遐方下吏部早選
賢才補用久之吏部言往者議省冗官也四川布政使
來朝言建昌管糧叅議一員可裁革令兵備副使攝之
吏部諸部議南北京十三省可革官本一時之議中間
去留不能遙知惟下南京及各省撫按官勘覆明白永
為經久之規奏可下有司未報前員至今未補四川撫
臣言是其冬十二月吏部上禮部主客郎中瑜精膳郎
中伊名上可其中一人實仲純李君為四川布政使司

叅議理建昌道事序曰四方之極京師最北閩廣最南
齊魯最東西方惟關中而四川最西自秦漢開蜀漸被
教化與中國亡異然山川懸遠夷獫猶存旣亂間作得
人則治失人則亂夫京輔之地吏多而政急其民難治
其吏輕遠方之吏寡而政寬其民易治其吏重海內亡
事遐邇寧謐吏若可省矣而變常不虞假使萬里之外
卒有旦夕之憂者當是時方思補吏以拯不亦緩於事
情乎遠方之員不可省也議者之言頗漏於是矣巴蜀

之地明興數被兵災然旣成不久四竟不擾旋作旋滅者豈非任吏參置之得宜乎宋大夫建復官議為慮誠深遠而又得李君以行朝議咸服仲純始為吏部司務懋行多學號稱最良擢為主客主客又宜漸歷一紀受是寵命故衆咸服也建昌雖遠努力為天子用於是文選驗封稽勲考功之寮咸餞而洪承志氏張崇禮氏高公照氏陳太初氏王惟周氏謂叔嗣得交仲純最久俾序其事

送麥元實之貴州提學序

今上元年叔嗣始遊京師舉進士海內賢豪畢集禮部
叔嗣得交山東黃德兆劉叔正李茂欽南京鄭師周
浙江應子陽廣東麥元實七人者又集于吏部是時文
治汪濊七人者出入燕喜以文友也亡時其後叔嗣除
營繕德兆職方叔正御史茂欽戶部師周行人子陽廣
平元實行人各解去其後叔嗣相次茂欽調吏部師周
叔正元實以使事出稍疎矣其後師周為御史叔正僉

憲茂欽元實以憂歸而叔嗣則謝病去七人者益落落
十年辛卯叔嗣再忝朝籍是時德兆以武選報罷矣叔
正繇四川謫判許州矣茂欽起家繇考功復謝病矣獨
師周自浙來子陽在廷評元實精膳四人者遇之詫而
各自驚相惜也亡何元實又以憲學之貴州矣繇歷癸
壬不出一紀間七人者浮轉愁懽殊塗異情不可勝說
回思疇曩之際俄如眩瞶爾使人愕嘆倡言曰達人所
以細萬物而遺吾身者身且遺之而計其它乎故遇其

得衆人驚抃誇調而未嘗喜也遇其失衆人哀戀悵惘而未嘗憂也今吾數人數遺迹而追往事撫當年而懼方來其心悶悶焉其貌皇皇焉其言戚戚焉怨茲會之莫再而數人者且不自料其將東西分析而莫誰止也於是拭涕不大可笑乎元實曰貴州大荒也去京師且萬里吾誰與居而不悲叔嗣以為生人貴遭時爾今吾與元實方年壯立德揚休垂光不朽視力所能匪善不為不然與衆人何異非疇曩所以抗衆顏而特立者志

也奚必京師為近而貴州遠乎於是坐者又俱嘆莫不
酸楚激昂是歲也德在壬辰背春首夏叔嗣師周子陽
飲元實室餞之四人者相樂也已而相與嘆明日麥子
遂南高叔嗣紀其事

楊方城公母太夫人壽序

嘉靖九年開封學長某祥符學長某商水學長某二學
生某百餘人相與議于學舍曰今天子顯意德化慮郡
國學敝則道術流遁士亡從以出故移近臣輟以領其

事甚重且寵方城公始用太子中允來治河南歲時行
視下國收才民間汰斥不可開書院拔異士次第稟食
之四方之士聆響畢輶又設春秋禮二經師集諸通是
藝者使漸習其間期于五學並盛繇是七郡之士斐然
回思于道天子之化旁流四溢烝烝向治于今二年某
等自度終無以稱塞公盛意者如何是歲三月二十九
日方城太夫人壽考七十始降之辰羣士又相與議曰
聞之其母賢者也其子肖盛德焉太夫人之德不出乎

閩竊觀方城公始舉進士于廷上擢為第一遭遇至隆也出入內廷坐議承明之廬兄弟結佩而趨儒者以為談先天子將建大用而試諸外自它人鮮不以為勞然人未嘗見方城公一語者是其所得宜當世所敢望哉此可以觀太夫人賢已則相與私于高子皆再拜言所以願為太夫人壽者狀如此叔嗣讓曰諸君誠欲進為太夫人壽者計必選于能言以頌述其事然後休德流于當世垂之亡窮為後之賢母式與古圖畫所著何以

異若僕不文上亡以奉颺師德下不足以效羣士之私
心是過聽而使僕也讓不能已于是纂次羣語以告于
祝史獻太母無疆之壽辭

送何進士元述惠州教授序

刑部進士何元述上書言臣有親也老臣舉進士得事
陛下幸甚願日夜思親養不能須臾願得學職食其
稟冀有秋毫以報天子可之十一年八月以元述為惠
州府學教授始何君登春官高子知其文於是何君過

高子而問所以教人奈何高子曰子欲易士習乎夫國以文取士試有定程已余與君皆繇是出也變之是反士好也人且不信夫官有條約慎取而行之無怠然士則固敏化矣何也吾子舉進士進士時所高少竢之可取尊顯然而君曰有親老矣日夜思親養如不能須臾竢願得學職此務求已志不求外知者假令矜一官亟趨榮顯忘父母養榮顯也計何益於身惠之士聞吾子之行固已灑然而異它日觀所事親旦暮趨堂下上食

稱壽愉愉和色君有二弟益敦友行人莫不感歎孝弟
興而化美躬行於家非外求益也所以教人者如是耳
夫人孰不能文前言哉而行不逮嘗為世姍笑欲教人
得乎自叔嗣任朝冠于今十年觀士習益媮操行不合
古人其修於家者非也此非為師者咎乎君惟端其行
而責實化自此始何子謂客吾得惠州而甚喜惠與泉
境接也土風不異道行纔十日相吾奉親旦暮趨堂下
上食稱壽吾以二弟從吾居也客問何子令子假三旌

之貴以受萬室之邑然而與父母日違也又遠兄弟則如何何子以為戚高子聞而叙之是時也餘姚錢君亦乞得蘇學

送徐君崇教江陵明府序

海內之勢譬者曰如身使臂如臂使指今由撫巡而藩臬是坐論者也由藩臬而府州縣是役使者也然縣尤難此譬以衆身而加一臂衆臂而加一指也為指者常病矣一省之大凡在上治者一人於縣無不統也為縣

者常病矣是故政令不宜則病因而行之則民被其疵
因而不行則我受其罪如此病已數易則病巡撫意有
所出御史方思而矯之前者革之後者方思而復之如
此病已計三歲終撫易一人或二人御史易三人矣藩
臬諸公大抵半易當是時縣方承其後雖冉季猶難民
性五方異宜緩治之不能不驕也急治之不能不怨也
計百里之境一人領其上百姓終日且不知吾心而能
知百姓之心乎吾朝夕奉上簿書不暇事上不暇而暇

行政乎二者均之難然民之難未若事上之難也故為
縣者順於下邪則民蒙其利而上不之予順於上邪則
上予之而民不蒙其利上予之則賢上不之予則否而
朝廷之用人也常繇之然則順於上乎吾秉道而行不
失諸已上果其人則猶我予也設非其人猶足免於罪
戾矣然則順於下乎此賢人之所以有志而衆人以為
不暇泛泛焉視之而棄之者也人臣幸得事天子雖繇
今至公卿鼎食無足異者無內外皆臣也豈以一縣而

棄之哉天子以印綬假我它人欲從旁撓之乎故上令可行行之不可行吾不行也寵利毀譽無秋毫疑於心政成而後去治定而賞及之則奏功乎一縣而天下且頌之又何計難乎此吾意也凡前難之者衆人意也鄉人徐崇教舉進士三年始試於江陵友人既祖之則繼之以言

贈山西王都司朴守中都留守司序

高皇帝既匡中國鑒宋之失武備弗振使夷狄內侵旣

被天下也法初貴武乃易樞密院為都督府五外設留守司一都指揮使司而下凡武職皆加文吏一等歲天下諸司表賀京師大鴻臚傳則留守司為首豈不欲強國勢示人以勇且使知王基所在耶然纔百六十餘年兵微疲人趨于文日習末儀為儒衣冠擇地而仕以養交游不任弓馬皆下留守司不樂其土高皇帝獎頑勵懦用役羣材稍百數十年遂若是中都之地周鄴鄆漢豐沛也祖宗陵墓所在湯沐之邑甚貴且嚴而人不樂

之何也視權所在而以無事為病也人病無事而遂忘
所事此最大患不足用法山西都指揮王君朴始用武
舉科簽書是司山西地迫邊陲而走京師也近民愒于
法難以設治未可旦夕處已而君遂居八年人皆強取
以為功而君獨退然無庸人皆眩智以媚時而君獨默
然無為人皆售材以爭進而君獨鬱然久困眾以是稱
君之廉靜廉靜非壯士節然貨利不入其心榮枯不易
其操固良將材已十四年九月天子拜君為留守司正

自山西視留守司留守司稍優君亡所擇置欣惡于是
益見君長者雖然海內方承平君久邊陲知士馬數道
里險易倉卒如為大將何以易子慎毋以無事自佚同
官于君之南也使叔嗣叙其言

贈楊方城公上山東布政左使序

上以侍從之臣政未洽于民乃歷試諸外若求輔弼則
用是而充諸臣或厭于是而有佚心故弗能于治惟方
城楊公不然公舉進士第一人為國史修撰太子中允

者七年出為山西按察司副使山西京師視為邊邑薄之公無所變已而徙河南用以修學政久之轉山東布政司叅政守海右諸道督漕入都越十四年轉為山西布政右使九年於外服益恪不懈政聲四塞吏民頤然靡不嘉頌夫上厲精中興本漢宣用蕭望之意下徙近臣而公覃於六籍學無所不觀文章為當世冠又不厭為吏越望之甚遠十五年七月二十日轉為山東左使迨次公卿之選叔嗣觀古者興國之臣皆木訥無文若

敝矣然而恒治則其人皆起民間習知疾苦所發政善也故內外均及其季也皆文學儒生若華矣然而不治則其人皆少貴不閑於事所發政舛也故重內而輕外高皇帝定天下畫十五省設官之制曰朕有天下更行省為承宣布政司所以承者朕命宣者代言布者張陳之政者軍民休戚國之利病自參政以下皆自辟屬蓋嘗御書其門顏其重如此山東西京師輔車之地士馬財賦緩急以需後世宜選賢建治而或薄之然則積輕

豈一日哉公于山東西皆再履之熟知閭閻利病道里
隘塞財賦所出無不講國既賴以為重遂據鼎鉉登元
宰受鴻名而佐道治俾天下內外之勢不偏當繇此已
吏民久矚望于今羣僚感公之東咸述明德作此序辭
以示後式嘉靖十五年歲次丙申秋八月之吉

贈曹堯我公上順天府尹序

嘉靖十五年九月山西巡撫都御史巡按御史言山西
災布政左使蘭施政最良事咸賴之雖三年滿願留以

治疏上報可會順天府尹關衆皆心儀之十月

闕

日

公果拜為尹始公以辛未進士為大宗伯大司馬屬聲
譽隆翕出補鳳陽府以不事權貴左遷浙江鹽運同知
無所動轉福建運使未拜起家山西太僕卿歷今官所
在不擾有去後思其在山西叔嗣幸得終始侍其治大
抵以廉靜為本一切繁浮屏去之財賦出納惟謹吏奉
行條約府中晏然無事是時山西壬癸甲連歲大饑而
省中多巨室大猾號難治公既與之休養而持法無所

縱舍吏無以為奸于是上下皆安故滿苑洛韓公言于朝也其言云云君子以為知言叔嗣觀漢之興也承周秦之敝高惠之間民不勝其病公家平陽侯順時之急師事蓋公與百姓休息故當時大治于漢為元臣後世稱賢相無繼之者公之學其繇來遠矣推是治天下可也京尹豈足言哉雖然山西三年賴公以息肩吏民無以留惟日夜望遂為宰輔施大惠以和四國願公無忘叔嗣竊不自外旦夕承以為師羣寮既祖俾序其行安

敢以不文辭

贈陳中川公拜山東按察使序

十四年乙未中川公由山西布政司叅政拜山東按察使高子受命序其行未就踰歲冬公拜河南布政右使既履任始畢序焉客謂公已遷拜補序之不近于復乎高子惟侍公之日久又代之守冀寧所知三事俱盛德可式恐後益久遂泯不傳乃作序以示永永其一山西甲午鄉試任西溪公為布政左使充提調當復用察佐

一人御史決之高子懲曩者同試南宮之事且不欲妨

衆辭去歸本鎮會任拜都御史遂撫山西當改辟中川
公卒引高子同事處其上不嫌也酉月朔又八日高子
始入院中諸事皆受成公考難亡不曉鬯每丙夜始寐
其精厲若此公少以善文四川舉之第一人登進士讀
中秘書學益閱邃為憲臣兩察學政士亡不歸師之名
高天下然院中每屬文一篇成必折諸人高子益嘗刪
之數字不辜也故人服公之量試稱得人錄文至京師

不至詆譏夫人苟心不相許鮮不以名相下遑恤其它
然則公之量莫可及已其二山西多豪族定襄人李仁
子希沆尚宗人女故家橫山築城自衛奪民田匿亡命
縣每索逋至城下第闔門相謝且數十年嘗惡縣令使
客盜其印陷之大皐郡中震焉莫誰何公以計縛殺仁
獄甫就而遷高子代之因墮其城歸所奪民田三百頃
劾希沆褫其官遠近大悅故人服公之明公下車常先
德化此細者何足著欲著其得民也其三五臺生王師

祖以私愛格殺其妻陽縊之室事聞公按之抵臯師祖
富於財萬端營之莫解既公遷也則或釋之高子治文
書得其卷歎曰是陳公所正獄也而可釋哉使吏發王
氏婦塚診其尸如生一縣中盡駭異乃殺師祖故人服
公之廉凡三事皆可紀且熟知之作是序

鄭太夫人壽序

光州鄭修之既登進士掌行人之職其冬受命禮部使
於蜀持節過邑而母夫人氏壽七十賓客咸賀於家祥

符人高子賢言曰夫人姓尚氏與憲使公禱同祖始歸於鄭生三子而寡貧矣夫人乃奮力勤儉躬視臧獲耕織家繇是振布衣蔬食積餘為子師友費故修之有成為天子使臣榮衍鄉閭也敬願祝夫人眉壽康樂無疆觀賢子之終成也以陟於尊位次歲癸巳陽和方始太夫人加年有一于古難致之物東海若木之杖西山桃實之觴玉山之禾以為飯丹丘之泉以為漿江妃仙佩洛浦明璫青雲之衣丹霞之裳願資以為獻是日夫人

出御北堂堂上畫西王母圖壺觴在左賓客在右修之
乃以諸賓拜為夫人賀夫人慈顏黃髮愉有壽色雖繇
今百歲未艾也諸賓皆拜遂為修之賀叔嗣觀古者國
家之興不獨其君子賢也蓋皆有母德云然內德幽貞
不容贊已自予與鄭修之遊也謙抑博約以予陪役春
試始終執其禮不肯以齒先此非其修習於家者厚也
不能然者故吾欲祝太夫人于子考之雖微善言竊不
自外願從諸友後以獻期耄之壽

送張東田伯翔致仕文

昔漢河間相張平子居職不樂渙浚是愠故敘四愁之
詩作歸田之賦後世君子伏讀其書未嘗不嘉奇志之
高翔而恨盛德之終訕也江都東田先生守河南布政
左使引疾遽歸解印將逝抱素願以自潔嗣玄風而高
蹈抗疏王庭兩致其辭悼行年之將邁顧與物之多違
奉職無狀中切憂危語具在前後疏中於是有詔特釋
其位未老懸車暫以逃祿初先生以南陽叅政病免于

家杜門受業鄉里服化奄及七年絕意榮寵會今上協
九五以開期登十六而該輔始起家四川叅政河南布
政右使尋領今官數月三遷強出巖石固已使朝廷虛
心而仄席縉紳拱手而避位然猶甘守屠羊之心不顧
飛龍之運此固逸民之絕軌盛世之貞士也昔先王圖
治旁求俊傑必崇謙退以防橫流人無老成儀刑安取
羣僚在列莫止其行咨嗟徒倚咸馳空谷之情銜遵渚
之思遂因出祖使獻其文云爾

南山詩序

粵在癸巳九月叔嗣被役于山西繇潞安以朝于藩國
踰年甲午二月望遂分守冀南行諸縣因復朝焉凡再
見宴禮有加然叔嗣天子外臣使事嚴恪不敢自越竊
觀于王國諸族睦悅咸蹈于禮闔郡肅如也而王國諸
臣長史宗孔南儀賓瑤賢六七人者以文相友歲時賦
詩稱壽號為最盛若東火之仇又敦禮克讓非感化于
德教則不臻此聖天子以道理萬邦藩國克守侯度本

支百億磐石四安皇天其錫蔭國家者亡窮縱有善頌
無以益其說愚如叔嗣也又何以言者於是瑤再拜言
曰惟王盛德有文當垂永永與明亡極配於南山羣臣
歌頌咸藉於斯義放詩魯頌號其編曰潘頌詩凡如干
篇視叔嗣其目

研岡先生集序

河南中國之樞四方之都會人文最盛明興沾濡王化
瓌傑挺生自叔嗣得承宴侍若空同李先生大復何先

生浚川王先生後渠崔先生柳泉馬先生有涯孟先生
研岡杜先生七公猶宗廟之有瑚璉朝廷之有梁棟士
用仰止觀其精美之蘊卓犖之節敷為政事發為議論
衍為辭章著為翰墨皆中渠度以垂法式巨細咸宜物
理必該成一家言而余得交于研岡實有忘年之誼相
與考先王之道遵哲人之軌彌歷年所叔嗣始為隸古
之學本以說文證以鼎彝考以漢碑准以章草先生不
謂之異為辭賦之學先國風楚騷次漢樂府昭明所選

下涉盛唐先生不謂之溺為制度之學考周五官酌漢
八書及唐六典遵諸司職掌先生不謂之迂泊然自守
不養交遊不貴權勢以違于時先生不謂之愚道合則
從不合而去仕于吏部屢進屢逐補吏邊隅先生不謂
之罪可謂相得于形骸之外已先生有集若干卷衆刻
之傳於世叔嗣蒙知最深宜序左方竊見我明有天下
四海內外咸稱臣妾百六十年兵戈寢息紀綱政治罔
不畫一學士大夫講為文藝比跡先民遭進今上益隆

文治禮樂修明小大顒然咸登諸用數君子生其際遂
享大名為儒宗匠若是昔在有唐詩道中興許燕擅其
美沈宋極其至其後李白杜甫之流遂作雄詞逸氣沛
若江河上掩前古莫之與京白之詩曰揚馬激頰波開
流蕩無垠蓋傷周楚之音亡而漢魏之聲離已然甫白
之開流則亦已甚作者靡不遵其軌轍慕其風猷以迄
于今羣公繼焉點翰敷詞不翅抗行翕然同響盈被朝
野文章之作于斯為盛後有知言必是焉觀叔嗣既守

邊隅不復奉對以究緒論錄感遇之由爰及數公庶梁
宋之間聞之以勸

撫平錄序

嘉靖十二年大同之卒復嬰城告變朝廷議將盡治以
懲以天下之兵翦此方隅無不得意而非天子之仁也
故誅其元兇矜其醜類選良臣焉以善其政布我大惠
惟邊徼之恤于是都察院右僉都御史雙岳樊公實受
寵命照臨茲土公緣上德意除苛用輕蕩然與士卒更

始仁恩汪濊凡境內外靡不懽賴强者寢憂弱者忘死
安其室家有其孫子疆宇太和由是考戎實修馬政興
廢舉墜摹畫精明奮兵擊虜鳴鏑遠徙奏功京師天子
大悅璽書以勞賜服嘉新吏民歌頌載諸圖牒叔嗣惟
邊塞之民與中國異本以謫戍屯諸境上扞蔽戎虜使
內亡憂惟其桀勇以為邊畧豈它之慮蓋徒恐不知天
子之仁所以生息之故今大同之卒既以自亂上寬其
死懷服明德公復申之其澤益深無不履戴邊境以亡

警功德至盛宜有歌詩傳之無窮惟公曾大父司馬府
君當永樂辛未之歲策名受事出入兩朝翊贊宣皇開
府濟寧勲績爛然垂于後裔餘休永長公以正德辛未
登朝光嗣前列為國鼎臣文事武功異世同符歌頌之
作代有其人充盈于家榮觀誦法必取于斯知府誥遂
刊為書叔嗣謹序諸左

再作老子集解序

考功薛先生既屏居毫一紀致崇於學庚寅始注老子

號曰集解余為序其書刊之甚著先生意未覃盡時復損益丁酉乃成視余讀之義加精微要以至道協于大中繇漢以來言老子者蓋至是決矣顧世莫有與知老子者又孰以知先生之注序曰始余少讀老子謂猶皇帝王伯之降所言殆上皇事爾朴而不華後世弗能用也誠竊之亦足寡營而致治壯益讀之則見與聖人之道亡牴牾可施于世特其辭所出抑揚已甚驟不能通愚者欲信之助以靈異繇是遂為儒家所詘置為養生

之書其徒守之至言湮晦要之古之聖人所學咸修已
治人之事或得有淺深見有純駁爾奈何絕去使世諱
言之老子之書殆於息矣余懷此意未有以明其後仕
都質之今祭酒武城王純父先生孔老所以異奈何純
父答之聃與尼父意同而言異彼生于周末睹文之盛
也嫉欲還之古故激言之激則不能亡過中已試言之
仲尼曰人而不仁如禮何禮云禮云玉帛云乎哉禮與
其奢也寧儉而聃則曰禮者忠信之薄而亂之首也其

激如此去仲尼之辭遠矣故尼父之書誦法萬世而聃
卒廢而為它也余藏其牘他日仕山西復質之今京尹
曹德芳先生其言聖人之言道也猶人之名天也中國
謂之天矣彼匈奴則謂之撐犁豈有二哉特其辭異耳
天固不自知而人強名之又爭辨之故學者誠求至于
道凡支言可忘也達哉言乎蓋二先生皆深于老子者
今以觀考功之注尤信易大傳曰天下同歸而殊塗一
致而百慮學者習而常聞如不見其同與一獨以其異

也遽詆訶之蓋讀其篇未訖往往已驚豈但老子邪嗚呼難言矣百世倘有其人固自知之余何暇置譽毀哉記二先生之語篇首復作序

太平經國書序

正德十四年余以增廣生被試策問周禮疑信相半之繇余方少竊聞其槩因以意對曰昔孔子之時周德方衰而對魯哀公以文武之政布在方策人存政舉之說及周益衰孟軻氏始言諸侯去先王之籍不得聞其詳

彼所稱方冊與籍豈謂周禮耶孔子尚思興東周孟子則直勸齊梁以王當是時不但其籍亡雖有之固不可為耶至荀卿之徒李斯佐秦遂取經籍一切焚棄之後世以為臯然使始皇并天下為周武王李斯有周公之聖其時欲行周禮能乎周之興也深仁厚澤垂十餘世聖后繼作禮樂法度莫不講明國以為教家以為學漸被陶融非一日也故周立為天子頒其政式放于四海靡然信從事若畫一不竢強勉其來遠矣秦則不然以

戰鬪為功以干戈為業法令已成習俗已定方其烹滅諸侯而六合為一也雖有周禮將安施之而况後秦者乎何也先王之法至周始備至秦始滅去此其會也後世直用秦為古耳秦不復行周禮明後世之不可行必矣然則是書可盡廢耶何為其然也三禮莫古于儀周公所親定者說文云禮之字從豆從曲從示示古神祇字蓋先王于邁豆神祇之間曲盡其意于是乎錄其升降等其隆殺故謂之禮此其跡也先王之意有不在是

者周易觀之彖曰盥而不薦有孚顒若先王以其誠敬之心事神故下觀而化故傳曰聖人以神道設教而天下服矣今夫官名之設內外之辨崇卑之度多寡之數成周致治之具也而所以致治豈盡于是耶故善為治者師其意而已若周禮者存之以考可也其畧云耳是時南原王先生督學優之其年叔嗣舉于鄉後三年得進士為考功主事始好是書聞人有異本不憚求之同縣人按察副使田勤甫氏刊周禮集說讀其中徃徃引

太平經國書可觀取恨不見其全他日翰林學士姚維
東氏云有之傳以示叔嗣錄藏于家後十年而為嘉靖
丙申上冬朔日刊于山西布政司

栗上黨集序

上黨栗道夫弱冠志學與古為匹遯迹太行之麓十年
絃誦思幽入玄上瞰周秦之閭奧下涉隋唐之波流著
詩若干卷歲己丑余解司封郎中屏居梁墟盡謝親友
道甫擔簦相造雞黍終日笑言甚得乃出茲編三復嗟

歎故贈予詩云高風今重世大隱不居山遂忘年焉道甫既連舉不第詩名益振名卿大夫想見其人稱不容口癸巳余出守晉陽道經潞上見道甫于家總理文翰探得彌深又贈余詩云風聲隨斗望精采若雲流投篇相答邈不可逮余乃辭去每持瑤章把玩忘疲嗟乎余少而無聞長而倦學名本東家之愚夫情類南郭之喪我曾何所知敢與斯文然于當世之士未嘗不聆言而心賞睹形而目成也道甫之作良契余懷誠無虛獎昔

中郎倒屣於仲宣少府薦表于平正世亮有精鑒茲編者行役之餘輒綴數語用俟哲人

栗陳州詩序

夫藝士才高位卑者自古不可勝數然名苟足稱雖詘焉豈可恨哉上黨栗道甫者余識之愛其文乙未歲朝京師翰林編修唐君應德語余曰道甫詩可傳復誦其伯氏仁甫尤長歌詩思見之未閒也仁甫登乙丑進士會試第三人例以父尚縣君不得備宿衛補為陳州知

州亡何遭讒口棄官築舍五龍山下屏迹不入城兄弟
講業其間人謂其負謗易白而陳州辨不肯力咸悲其
不遇余聞古之達人讓卿相之位屠羊灌園有逃之沒
齒者世豈能度陳州之心耶夫懷金珮玉捐避人主之
前誠與滅迹雲峯者不可同日語顧持操苟無悶當無
疚于衷已丙申余始得陳州詩乃道甫為之次之者讀
之終篇察其身名之際畧無所恨其所得遠矣余曩者
嘗學于斯藝思所折衷性弱復善忘不能為弘麗之詞

每數日纔譔一篇不喜輒棄去今益怠何足與知詩乎
慢懶相乘願自放于山林之間聊作以抒憂耳故睹于
陳州之述益感焉

任吏部集序

固陵先生始舉進士奉大對今上親題其文直詞絕識
名冠海內士莫不延頸願托末交余辛卯春再登上國
首奉款曲宴語闌宵相得甚真乃投贈詩云文章知汝
在交誼為誰深既遂別去其後余遷守邊垂世故相繫

親交日疎疑莫與匹乙未春得以覲事祇役闕下先生
猶敦夙好不薄厭之感谷風之誼誦同人之言君子于
是知友道存焉時則翰林唐君應德陳君約之司勳李
君伯華咸相綜理文藝啟發微言一朝大振余拘以外
寮不得久侍遂錄先生詩歌文論總若干首用著矜式
夫李白有詩人之材而無詩人之識杜甫有詩人之識
而無詩人之度故言匪世法動迂于時余觀先生雍容
謙和聲華益遠制行以周孔為師陳詞與詩書比軌不

激而高不刻而工治世之音于斯以備明王之佐舍是
焉適先生復不以余陋而使綴名于簡輒不避遜敢揚
大雅夫世有心賞之士弘麗精微苟有見於斯編其必
讚歎愉悅犁然自解又何賴于余言乎是歲蘇門山人
高叔嗣謹序

內鄉王殿下謁園廟序

夫執圭結駟位由德尊玉食瑤宮道匪人替維昔皇祖
疏土建邦模漢京倣周制本支茂於百世磐石冠乎諸

劉周自定王肇啟茲土加大邑以褒稱慕小山而典學
內鄉諸國殆且百餘諸侯祭于其祖厥禮存乎有司歲
庚寅十月內鄉殿下乃啟龜以卜吉載鳶而祖行授館
不驚上食在道遂用登于某山實惟定王卜藏衣冠之
所也齋明有虔改服而進神靈肅肅孝思蒸蒸鸞旂宿
於青山牢醴修於碧殿刊石紀美禮成而還王國諸臣
僉曰惟上稽堯典以睦九族體比象而親萬國大孝之
化洽被宇內今王蒙犯風露馳驅山川展敬園塋起感

水木一物不煩于民間百禮盡徵於士類自非純孝永
思篤志履道者孰與于此且王自喪元妃遂虛內寢後
宮之絲竹生塵賓庭之纓冕成市好古邁河間之風為
善小東平之日休懿貞範不述何觀載金石而不朽被
絃管以日新昭德興文將俟君子叔嗣不敏家本夷門
人同抱關之生地雖梁苑才非授簡之叟故畧為著其
大都以貽無窮云爾

老子集解序

毫老子所產也初老子著書言天道玄虛自漢以下莫能邇其本旨咸窺見一偏說由此起故其書曰離州人薛考功先生始覃思大道之原究意天人之一折衷羣言合于渠度老子之道則粲然大明書成嘉靖九年歲在庚寅之次敘曰大道之歸一致而百慮聖人之旨同情而異言昔仲尼之門罕言天道是以後世無得聞焉然周易乾爻配象六龍始於勿用終於窮亢不以吉凶告人用九見羣龍無首則吉而仲尼贊之曰用九天德

不可為首也乾元用九乃見天則蓋剛而能柔天之道也此與老子何異故稱吾見老子其猶龍乎夫學者獨患天人之分不明天人之分不明則其議聖人者陋矣自古言仁義禮樂有過於孔子者乎然而非不知天也言陰陽剛柔有過於老子者乎然而非不知人也顧聖人示人有不同其所言者學者之所信也所不言者學者之所疑也故世之為老子者則絀儒學儒學亦絀老子夫知人而不知天者近乎愚知天而不知人者近乎

誣奈何以此議聖人也或曰老子養生之書夫聖人之
道內之以養其身則壽而康外之以理乎物則順而治
聖王之事同條共貫豈有他哉作者既皆已沒景響什
絕所謂其人與骨皆已朽者神而明之存乎其人薛氏
老子集解二卷藏于家予錄其副焉

刻二張詩集序

二張九齡韶州人字子壽謚文獻有曲江集說雒陽人
字道濟謚文貞有燕公集馬氏經籍通攷載之自文章

道熄修文之士薈萃篇題畧采名作習所目見不復知
有諸家集余曩歲得曲江集京師蓋丘文莊公錄自閣
本刊傳之求燕公集亡有也後再至都始獲寫本友人
大理評事應君子陽有宋刻然不完二集缺謬亡復可
攷二公俱唐相事玄宗遭李林甫文獻出為荊州文貞
出為岳州敘曰夫詩之作豈不緣情哉余讀二公詩方
其登台衡執鼎鉉抽筆蘭室雍容應制詞何澤也及臨
荊南履岳牧懷人寄言託物寫心又何悽也夫士抱器

丁年曷嘗不欲感會雲龍道佐明主建不朽之業垂非常之譽乎而時謬不然遠迹江海之溘放意魚鳥之區事與願違心以迹孤况逢按劍之怒方同竊鈇之疑知讒不免欲語從誰是以憂來無端咸宣于詩爾嘗觀文獻在荆詩云一跌不自保萬金焉可尋又云衆口金可鑠孤心絲共棼文貞在岳詩云誰念三千里江潭一老翁又云平生歌舞席誰憶不歸人詞旨悲涼令人太息然文貞特牽歸思而文獻良多懼心豈其遭傾奪之餘

尚險仄未平耶今集中載林甫秋夜一篇公酬答甚遜
得于周易避咎之道焉彼讒人者竟泯漸何在而公名
德爛然存于終古嗚呼哲哉叔嗣遊郎署時覽公詩未
覺沉痛既涉江漢三復焉乃知意所由興復以嘗踐茲
地也因合刻之置廣視堂齋中堂據江夏山首下瞰江
漢前使君葉縣衛正夫修築嘉靖丁酉夏四月朔

蘇門集卷五